

NOS HIMNO: Skirbi na 1951, ta bira e himno oficial di nos isla na 1976

ARUBA DUSHI TERA ta e titulo di composicion musical cu a bira oficialmente e himno nacional di Aruba. Pa nos historia ta interesante, importante y hasta necesario pa duna un relato, maske ta cortico, di e factor nan responsable pa e nacimiento di Aruba Dushi Tera, su desaroyo gradual den nos comunidad como medio di expresion di patriotismo y finalmente su aceptacion oficial como himno nacional di Aruba. E historia di e himno di Aruba ta haya su inicio den e actividadnan y aspiracion den e dos ciudadanonan responsable pa creacion di nos himno. A sosode cu na aña 1951, Srs. Rufo Wever y Padu Lampe, dos musico bon conoci ariba nos isla, a sinti e necesidad pa cuminsa conserva y promove lo cual a worde considera di ta e ritmo y melodianan tipico di Aruba. Inspira pa tal idea, conhuntamente nan a cuminsa cu grabacion y produccion di disconan di 78 rpm, cual a worde lanza ariba plaza di Antiyas Hulandes. E musica cu tabata worde produci tabata composicionnan original di Rufo Wever y Padu Lampe mes, algun numero cu conhuntamente nan a compone, piezanan di algun compositornan bieuw di Aruba y tambe e musica perteneciente na e folklor di Aruba. Di e forma aki nan a haci un contribucion sumamente valioso pa conservacion y propagacion di nos


ritmonan mas gusta, manera wals y tumba, cu awe ta sigui resona cu alegria den oido di nos pueblo. Manera custumber, un dia mainta na aña 1952 (e fecha exacto no ta conoci) Padu a yega cerca Rufo, pero e biaha aki cu iniciativa pa conhuntamente nan compone un pieza cual lo mester expresa e amor di nos pueblo pa Aruba y desperta su sentimento patriotico pa su isla natal. Claramente a surgi e pregunta si e pieza mester worde traha den ritmo di marcha, ya cu su finalidad ta pa crea amor y desperta sentimentonan patriotico pa Aruba, of na wals, cu ta un ritmo tipico di nos folklor musical. E solucion tabata facil, ya cu e figura di e melodía por a worde crea den un forma cu e pieza por a worde interpreta corectamente tanto den ritmo di marcha como den ritmo di wals. E mes un dia ey e pieza a keda cla, ARUBA DUSHI TERA a nace, completo cu letra y musica, manera e pueblo di Aruba por a conoce durante e ultimo 22 añanan. Pa motibonan tecnico fuera di alcance di compositornan, ARUBA DUSHI TERA no por a worde graba y lanza ariba plaza pa nan mes manera tabata nan custumber di haci cu nan piezanan. Na aña 1954 dos di nos radio emisoranan a yega di transmitir Aruba Dushi Tera den ritmo di marcha tambe. E compositornan a haya e impresion cu den ritmo di

wals e pieza a cay mas na smaak di hopi hende. Gracias na e activo organizacion "De Trupialen" e tempo ey bao e dinamico direccion di Frere Alexius, ARUBA DUSHI TERA a worde hinca den nan repertorio y a cuminsa haya mas popularidad. Den corto tempo, casi tur e muchanan di school tabata sabi e, y tabata cante, hasta na aubadenan na ocasionnan oficial di gobierno. Su popularidad den pueblo a haya su climax ora cu ariba iniciativa di Frere Alexius na aña 1954, Radio Kelkboom a graba y lanza un disco di 78 rpm di ARUBA DUSHI TERA ariba plaza, canta pa e stemnan juvenil y comovedor di "De Trupialen" bao direccion di Frere Alexius y acompaña den su estilo unico na piano pa Padu Lampe. Poco poco y espontaneamente otro instantianan priva y oficial a cuminsa usa ARUBA DUSHI TERA na tur ocasion di importancia pa nos isla. Den luz di e desaroyonan aki, y teniendo cuenta cu e pueblo su creciente deseo pa haya su libertad politico, e gobierno insular di Aruba, cu tabata na poder, ariba un mandat^o especial di pueblo pa a traha pa realizacion di un "Status aparte" pa Aruba, a sinti e necesidad pa cuminsa prepara e caminda pa yega na tal meta. Tumando e promer paso e gobierno aki a resolve di duna Aruba aparte di su

escudo, tambe su propio himno nacional y su propio bandera, ya cu especialmente e himno y bandera di un pais ta e simbolonan mas valioso cu por inspira un pueblo den su afan pa demostra sentimentonan di amor y patriotismo. Tabata di spera anto cu Aruba Dushi Tera lo bin na consideracion pa bira e himno nacional di Aruba, ya cu dia 19 di September 1975, como punto di programa di gobierno insular di Aruba, na ocasion di inauguracion di e edificio nobo di Parlamento di Aruba, Aruba Dushi Tera, e biaha aki den tempo di marcha pa e por worde huzga con e ta zona den e ritmo aki, a bolbe resona den voz di e conocido tenor Arubano, Sr. Rufo Odor, respalda pa e potente coro Vivons en Chantant, na cual ocasion tur e autoridadnan politico di Aruba y Antiyas presente a dune su debido respet y honor. Dia 21 di Januari 1976, gobierno insular di Aruba a instala un comision di seis ciudadano prominente y apolitico di nos comunidad esta Sra. M. ArendsCroes, Sres. R.A. Odor, J.C. (Padu) Lampe, E. Bennet, H. Booi y R. Wever y un secretario, Sr. J. E. Wever, cu e tarea di conseha e gobierno insular di Aruba ariba e pregunta cu su preferencia pa haci Aruba Dushi Tera e himno nacional di Aruba ta na su lugar, si of no, y si den un caso afirmativo, den cual ritmo, esta marcha of wals, lo e mester worde proclama como tal. Y si den caso noafirmativo, cu e comision por bin cu sugerencianan nobo pa por yega na haya un himno nacional pa Aruba. Durante un votacion secreto ariba e pregunta cu si ta Aruba Dushi Tera por worde recomenda pa bira e himno nacional di Aruba si of no, e

comision den su totalidad, unanimamente a vota en pro pa recomenda Aruba Dushi Tera pa tal fin. Ariba e pregunta cu si ta den tempo di marcha of wals e himno lo mester worde interpreta, e comision den su totalidad y unanimamente a considera cu e mester keda den su ritmo di wals moderato, manera e pueblo ya a custumbra cune y cual tambe por worde considera di ta un ritmo tipico di nos isla y como tal, algo di nos propio identidad. Tambe e proposicion di e autornan pa añañi un couplet mas na e himno, cu ta elogia e cordialidad di e pueblo di Aruba y su amor pa libertad, a keda acepta pa e comision. E comision a somete su recomendacion na Gobierno Insular ariba 25 di Februari 1976 y ariba 16 di Maart 1976 Parlamento di Aruba a aproba "Aruba Dushi Tera" como himno official di Aruba. Asina a bin sosode cu ariba e anochi di e dia 18 di Maart, 1976, pa e acto official memorable organiza pa gobierno insular di Aruba den Wilhelmina Stadion, pa proclamacion oficial di nos himno y bandera, y den presencia di un inmenso multitud di nos ciudadanonan presente, Aruba Dushi Tera, pa di prome biaha a resona oficialmente como himno nacional di Aruba, conmovedoramente interpreta pa stemnan di un coro juvenil bao direccion di Sra. Maybeline Arends Croes, acompaña pa e orquesta sinfonico, dirigi pa e conocido ciudadano y musico, Sr. Joy Kock. Na un momento asina di tan grandi significacion pa nos pueblo y cu semper lo keda registra den analnan di nos historia, tabata obvio cu hopi Arubiano di gran sentimiento no por a logra suprimi lagrimanan di emocion y alegria.

TOTAL
SERVICES



Pabien ariba nos dia nacional di "Himno y Bandera". Felicitando henter e pueblo di Aruba, muy especialmente na nos clientenan y empleadonan di Total Services

BARANCA DI JERBA TA CELEBRA

Nos himno y bandera. Dia 18 di Maart: Diadomingo. Cumisa for di 1or di merdia.

Ku caha di orgel, mi amor, y disco, y pa 3or lo tin Rico Band te cu 8or. Lo tin un cuchina bon surti y un bar bon surti. Pueblo di Aruba completo ta invita pa bin celebra en grandi, alaves conoce nos bunita hoffie. Baranca di jerba y bin baila te cu 8or. Entrada: ta gratis. PABIEN ARUBA: